



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :

f Tir Yimym

Instagram tiryimym@aolima

YouTube tir yimym

TAPAK 7

Jaishankar-i Sri Lanka semdanga Oct 11
nü IORA senden nung adentsü

Bangladesh opposition lenir Zia
asütsü akok: Doctor



VOL. XXI NO. 04 (ADOK 04) DIMAPUR RASEMNÜ (WEDNESDAY) MONGPUTENI (OCTOBER) 11, 2023 ₹ 5.00

Deobarnü votes azüngtsüba magizüker: NPF

Dimapur, October 10, 2023

(TYO): Naga People's Front (NPF)-i Election Commission of India Secretary Sanjeev Kumar Prasad dangi shidi ka nung December 3, 2023 nü votes azüngtsü anogo lateta aliba melenshitsu metetdaksüogo.

Nagaland ya Khristantem teimba ser aliba state ka lir aser senso 90% tashi Khristantem lir ta MLA & Secretary General NPF Achumbemo Kikon-i shidi ka nung ashi.

Deobar anogo ya Khristantemi Tsüngrem külemba anogo ka lir ta nai meteta lir aser iba nung Nagaland dena lir. Anungji state balala nung assembly election den Nagaland nung 43 Tapi A/C by-

election indang Counting anogo melenshitsu mepishir, ta Achumbemo-isa shidi nung shia lir.

Iba kasa shidi ya Nagaland nung Chief Electoral Officer (CEO) dangia yokogo.

Hombarnü ECI-i November 7 nü 43 Tapi A/C by-election agitsü osang metetdaksü.

October 13 nü gazette notification agütsüsü, October 20 nü nomination asütsü, October 21 nü scrutiny aser October 23 nung nominations meyipa agitsü ta ECI-i metetdaksüogo.

November 7 nü polling asüba sülen December 3 (Deobar) votes azüngtsü ta ECI-isa ashi.

JD-U-i Tapi by-election nung toktepnür

Guwahati, October 10, 2023

(Agencies): Janata Dal-United (JD-U)-i Nagaland nung 43-Tapi assembly by-election nung tokteptsü tebilemba lir.

Iba atema party high command den asüngdangteper

lemtet ka agitsü ta JD-U Nagaland state unit president NSN Lotha-i ashi.

JD-U Nagaland-isa Rio-i aniba sorkar pusemstsüba aser Lok Sabha election atema jembiteptsü ta paisa ashi.

MNF-ia Deobarnü votes azüngtsü memelar

Aizawl, October 10, 2023

(Agencies): Election Commission of India (ECI)-i Deobarnü votes azüngtsü lemtetba magizüker ta Mizo National Front (MNF)-i metetdaksüogo.

Congress party Mizoram unit-i ECI den iba kasa olen ashiba sülen ghonda ishika lir MNF-i iba osang metetdaksü.

MNF-I ECI dang votes azüngtsüba anogo melentsü atema shidi ka zülüogo.

"Mizo nunger ajak Khristan lir aser Khristantem atema Deobar ya kanga dang tongtipang anogo lir. Mizoram state ajungalen Deobarnü tenla kidang sentep agir" ta MNF-i

shidi nung shia lir.

Iba jagi Mizo National Front-i Election Commission of India dang December 4, 2023 nü votes azüngtsü anogo melentsü asüngdang, ta parnokisa ashi.

Mizoram Congress president Lalsawta-ia Chief Election Commissioner Rajiv Kumar dangi züluba shidi ka nung "Deobar ya Mizoram nung alirtem asoshi temeshi anogo ka lir aser iba anogo ya Tsüngrem külemtsü asoshi bendanga agütsür" ta metetdaksüogo.

"Congress teloki dang masü saka Mizoram nung Khristan ajaki Deobarnü votes azüngtsü memulungtsü ta onoki meteta lir" ta Lalsawta-isa ashi.

Dimapur nung BAN Secretariat Office lapokogo



Dimapur, October 10, 2023

(TYO): October 10, 2023 nü Business Association of Nagas (BAN) secretariat office tasen ka lapokogo.

BAN indang office ya DC Court Junction, Dimapur nung Ours Building nung lir.

Sentong nung MLA Jwenga Seb-i tetushi tejaoker ka ama dang masü saka taoba BAN Executive Council Member ka ama shilem agia liasü.

MLA Jwenga-i o jembidang BAN ajanga Nagaland rongsenketzung tejakleni anir aruba aser alizüing atongtsü nangzükba ama inyakba atema tenüngsang agütsü.

BAN indang nükjidongji Naga nunger tsüngda amalitep alitsü aser külemi temaba jenjangi atutsüba lir anungji iba tangatetba nung maneni inyaka aotsü ayongzükür ta paisa metetdaksü.

Nagaland nung World Mental Health Day among



(Temalen) Nagaland State Mental Health Institute (SMHI) Kohima nung World Mental Health Day amongdang agiba aser (tsünglanglen) Dimapur Government College nung mental health awareness state-level seminar nung adenertem agiba noksa angur.

Kohima, October 10, 2023

(TYO): Nagaland State Mental Health Institute (SMHI) Kohima-i Mongulbarnü World Mental Health Day mongogo.

"Tekolok anema alitsüba ya meimchir temeten lir kechiyong meimchir ajak dak jenjang keta lir" ta Senior Medical Officer (SMO) SMHI Kohima, Dr. Nuvotso Khesoh-i ashi.

"Nisung ajak dak mental health shitak ayutsü temeten lir aser iba nung tekolok timtemtsüba tebilemstsütem, lokti nungi sendokba, bendanga amshiba, kin mezüngmeshiba, mapa manguba ajak nungi kümzüka ayutsüba temeten dena lir" ta Dr. Khesoh-isa ashi.

"Human rights aser mental health ya sendaktepa lir aser tekolok nung timtemertem ajanga meimchir temeten alema inyaksangshitsü ana nung lir. Ano tekolok shitak alir ka dak nungi temeten agienra pa/la tekolok nung timtem adoktsü ana nung dang lir" ta paisa ashi.

"Nisung aikati mental health illness mesüra mental illness aliba kibong ka indang khuret memetet. Asenoki loktiliba nung züngsem ajak timi litettsüsa

libalirotsüla" ta Dr Khesoh-isa ashi.

UN Human Right office ajanga tekolok nung timtem alirtem temang manemi dang alir, arishi tatsüba akümer ta ashir ta paisa metetdaksü.

India nung pei sasa soseta asür 1,64,033 liasü aser ibaji anogoshia nisung 449 sosetba ta National Crime Record Bureau (NCRB) 2022 ajanga metetdaksüogo ta paisa shisem.

Paisa mental health indang osang prokshitsü aser iba agi timtemer bendanga mamshitsü ayongzük.

Asenoki sen dalang agi mental health services agütsüsü aser iba atema Mental Health Care 2017 section 18 nunga temeten agüja lir. Ano asenoki workplace mental health program tenzüka agi nung ajungtsü kechiyong iba ajanga mapa inyakerkem kanga ajangzüksü, ta Dr Khesoh-isa tebilemba lemsatet.

"Mental health nung timtemer nem emotional support resources agütsüsü atema Community support networks tenzüksü nüngdaker. Maneni mental health timtem jelia metettsü atema early intervention program agitsüla" ta

paisha ashi.

Dimapur nunga Department of Psychology-i IQAC, Dimapur Government College aser District Mental Health Programme, Dimapur yaritepa mental health awareness state-level seminar ka ayonga agiogo.

Principal DGC Prof. Sanjay Sharma-i o jembidang mental health osang memetetba aser aibelena angatetba ajanga iba tebilemstsü asoshi süoki ia meinyaker ta ashi.

"College kaketshirtem asoshi curriculum nung mental health indang course enoktsüla. Mental Health aser Stress Management, Emotional Intelligence amala course adentsüla" ta Prof. Sanjay Sharma-isa ashi.

Iba sentong nung Dr. A. Tamsuyanger Ao, Psychiatrist, Nodal Officer, District Mental Health Programme, Dimapur ajanga "Psychological state of Mind, Body, Mental illness and Addiction" onük jembi.

"Mental health ya nisung ajak asoshi kanga dang tongtipang aser tekolok manemertem senzüka yutsüba tangatetba yuaya agientsüla" ta Dr. Tamsuyanger-i ashi.

Myanmar arrtsülen smart fencing system enoktsü: MHA

Imphal, October 10, 2023

(Agencies): Ministry of Home Affairs (MHA)-i India-Myanmar arrtsü kilometre 100 atsüandangtsü indang osang metetdaksüogo.

MHA-i advanced smart fence system enoktsü sentong lir ta 2022-23 annual report nung shia lir.

May 3 nungi Manipur nung kin o kin rara adokba nung Myanmar arrtsü matsüdangba aser nisungtem tenokdangba kecha melii aruba dena lir.

"Manipur nung Meitei, Naga, Kuki, Zomi, Hmar telungpur teloktem ajanga timtemer.

August 2008 nungi telungpur

telok 23-i India sorkar den Suspension of Operation [SoO] agia lir" ta MHA-isa ashi.

Parnok ya United Peoples' Front (UPF) kübok telok 8 aser Kuki National Organisation (KNO) kübok telok 15 lir.

India aser Myanmar tsüngda Free Movement Regime (FMR) lir. Iba ajanga arrtsülen kilometre 16 telongtet nung alirtem border pass melii senzüsönbongteter aser khen arudang hopta ana tashi mongteter. Ajisüaka COVID-19 wara ajanga Manipur-i 2020 nung FMR anena ata, ta MHA-isa metetdaksü.

Manipur Chief Minister N.

Biren Singh-i Myanmar den FMR agientsü aser atsü atsüandangtsü atema ayongzükogo.

Myanmar den Arunachal Pradesh-i kilometre 520, Nagaland-i kilometre 215 km, Manipur-i kilometre 398 aser Mizoram-i kilometre 510 agi arrtsütepa lir.

Border Roads Organisation (BRO) nem Moreh, Manipur nung Myanmar den arrtsü kilometre 10.023 atsüandangtsü mapa lemezükja lir. Parnoki kilometre 6.812 tashi atsüdangogo aser taküm tashi nung tanungba tesemtem atsüandangtsü imlar.

Mokokchung nung World Mental Health Day amung



Dimapur, Mongputeni/Oct. 10 (TYO): District Mental Health Programme, Mokokchung ajanga Mokokchung District Legal Service Authority den lungjemer Mokokchung district kubok Multi-purpose Hall, IMDH nung "Mental Health is a Universal Human Right" omen nung ajemdaker World Mental Health Day munga liasü.

Dr. Limanaro, DPO (NCD) ajanga iba sentong nung

jembidang, Mental Health tsütsü awareness agütsütsü aser Mental illness ajanga timtemer ashi-aponga bilemba samadaksütsü nukjidong nung iba anogo ya amunger, ta ashi.

Health ya temang anema aliba indang kisung masü saka 'mental wellbeing' densema lir aser mental health dak sendakba nung ashi-aponga bilemba samadaksütsü nungdaker, anungji nüburttem nem mental health indang awareness

agütsütsüla, ta sentong nung shilem agirtem ajungshia liasü.

Iba anogomung omen nung ajemdaker Mokokchung District Legal Service Authority nungi jembia liasü aser Vice Principal, School of Nursing IMDH ajanga tarur pela agizükba o jembi.

Iba sentong nung Dr Kibangkumba CMO, School of Nursing, Mokokchung District Legal Service Authority aser IEC staff tem dena liasü.

Secretariat Peons/MTS nem training agütsü

Kohima, Mongputeni/Oct. 10 (TYO): Secretariat Office indang Peon/MTS pur nem Officer Procedures and Etiquettes indang anogo ka workshop sentong Secretariat Administration Branch 'B' Home department ajanga Secretariat Conference Hall, Kohima nung October 10, 2023 nü ayongzuka liasü.

Addl. Secretary, Home, Shayung Phom, NCS ajanga training agirtem den tajungshi o jembidang department inakyim

nung parnoki tongti shilem agiba indang jembi aser pei nem nungloktsüba mapa kanga kumdanga inyaksü ajungshia liasü.

Paisa ketdangsür den tesendaktep tajung alitsü nenshia ashi aser ibaji ajanga anogoshi office mapa tajungtiba nung inyaktetsü, ta ashi.

MTAs asoshi kanga nungdaka aliba workshop ayongzükba atema pai Home Department ketdangsür nem tenüngsang agütsü aser iba

training ajanga training nung adener temi mapa tajungba inyaktetsü imlar, ta Shayung Phom-isa ashi.

Iba workshop nung shisalen sayur ya Under Secretary Rhonthungo Andreas, Additional State Protocol Officer aser Joint Secretary Neikedoulie nungertem liasü.

Iba workshop nung conducts rules, leaves rules aser office etiquettes amala onüktem jembia liasü aser shilem agirtem nem kulizüng kaket agüja liasü.

Post Office ajanga nübür koma yarir iba indang lemsatepba sentong aka



Chuchuyimpang yimtak India Post ajanga nübür koma yarir iba indang lemsatep sentong agir kelen Post Office nung inyakertem sentong nung tongti shilem agirtem aser sentong nung adenertem külemi tangokba noksa.

Mokokchung, Mongputeni/October 10(TYO): Chuchuyimpang yimak tanu Postal Department-i ayongzuka Dak Community Development Programme (DCDP) sentong ka "Bring Government to your Doorstep" ta asüba omen nung ajemdaker kaogo.

India Post ajanga iba sentong ya yimtsüng nung alir nüburttem shirnoki Bank inakyim memetet, itemji metetdaksütsü asoshi aser talisa Post office ajanga nüburttem kechisa tajangzük ngutetsü item shisatsüji agutsüba lir.

Post office ya shity belenshiba department ka dang masü saka Post Office Bank nung sen rizünga ayuba ajanga tajangzük anguba terasa iba sentong nung Post Office Mokokchung nung tongtipurtemi lemsatep.

Mokokchung Post Office nung tongtipurtemisa Village

Post Office aser Town Post Office ajanga nüburttemi teyari mela mela agitetsü aser ano talisa tetsür tanurtem tajangzük aika ngutetsü aliba indang tejang lemsatepa liasü.

Sentong nung Chuchuyimpang Village Council Chairman Temsümoa Imsongi jembidang akhi mapang nungbo Post Office ajanga shity dang belenshiba angazüka aser mgua aru, saka tanu putu nungbo alima melenshia aoba den tsüngkang medem Post Office ajanga nüburttem yaritettsü lemang sadema lapokbaji nüburttem asoshi temoatsü tulu lir, aji asünung Post Office nung inyakertem pei nübür ajangzükdaksütsü asoshi tanu ama sentong ayongzuka teteyuba agutsütsü kanga dang nungtakerta Postal Department nung inyakertem ayongzük.

Iba sentong nung Tsüngrem lenisüba jazüka Chuchuyimpang Baptist Arogo Pastor

Rev.I.Wati Imsongi sarasadema tenzük aser Impur Post Office Sub Postmaster Kilangkumla Longchar ketdangsüba nung agi aser Postal department tenung nung Superintendent of Post Nagaland Division L.Tiken Singh ajanga tarur pela agizükba den iba sentong agiba nukjidong rateta ashi aser Sub Divisional Inspector of Post Offices: Mokokchung Kevikhrielie Kire-i anküp o jembi. Iba sentong agiba den Social Welfare Dept. tenung nung Coordinator PMMVY(DHEW) Tajunglila, Agriculture Dept. tenung nung Deputy District Agriculture Officer Maongsangla aser Welfare Dept. tenung nung District Welfare Officer I.Mangliyanga parnoki parnoki departem-tem nungi sorkari kechisa nüburttem nem teyari agutsüdar itemji rateta ashiba den ano item Post office teyari agia tajangzük koma angutsü itemji tatongi lemsatepa liasü.

Padmashree Natwar Thakkar asoba anogomung amung

Dimapur, Mongputeni/Oct. 10 (TYO): Padmashree angur aser Nagaland Gandhi Ashram (NGA) tenzük asür Natwar Thakkar sor küm 91 ajungba 5 buba Noble Deeds Day nungtem nung Chuchuyimlang Kaketshir Telongjem (CKT)-i 'Anu Mai' Amphitheatre, Chuchuyimlang nung October 9, 2023 nü ayongzuka monga liasü.

Yim meketa aliba kaketshir telongjem, schools, departments, lokti balala, Nagaland Gandhi Ashram tsürabor aser nüburttem jaoka iba sentong temoatsü nung among. Iba sentong nung O jembir Marsanen Imsong, tir, Langpangkong Tzükong Mungdang (LTM) ajanga asür Thakkar-i Langpangkong aser Naga nung asoshi tebandang makai mapa tajung inyaksüba otsü lemsatepba den külemi nisung shia iba mapa tajung obola otsü nungi angazüka angoshia benshia senmang tajungka kümdakja amshia

aotsü ayongzük.

Tarutsü nungbo Tzükong aser alima balala nung iba mapa aser osang tajung porokshia amongtsü yimlar, ta pai shisem.

Iba sentong nungsa Rev. T Lima, Pastor, Chuchuyimlang Baptist Arogo aser Dr. Aotoshi NGA Managing Trustee ajanga o tajung lemsatepba den külemi Chuchuyimlang Riongsanger Putu nungi Guru Chubatozung ajanga nübür ajungshia liasü.

Noble Deeds Day ya Padmashree Late Natwar Thakkar (NGA) nungtem nung pa asoba anogo October 9, 2019 nungi Chuchuyimlang Riongsanger Putu ajanga ayimzuka yokba ama Chuchuyimlang Kaketshir Telongjem-i achiyanga ayongzuka munga arur.

Iba anogo nung pei kidanger, makamaiter, manemmalur aser nübür balala den pei angatetba aser akaba agi lemsatepa Padmashree Late Natwar Thakkar bilemteta kümshia October 9 anogo nung amonger.

Angh La Ganesan-i National Integration Tour agizük



Dimapur, Mongputeni/Oct. 10 (TYO): Nagaland Angh, La Ganesan-i National Integration Tour 2023 aortem Raj Bhavan, Kohima nung agizüka liasü.

Chakabama meketa aliba yimtsüngtem nungi kaketshir 19-i iba National Integration Tour 2023 nung shilem ka ama Kumaon region, Naga Regimental Centre Ranikhet, Indian Military Academy Dehradun, Rashtriya Indian Military College Dehradun, Kartavya Path, Rashtrapati Bhavan, malls, kaket reju aser tongtipang tesem balala sema jaja liasü.

Parnok agizükba sentong nung Raj Bhavan nung ketdangsür aser staff tem, PRO Assam Rifles aser par telok aser 16 Kumaon Regiment nungi ketdangsür aser jawan tem dena liasü.

Iba sentong ya Raj Bhavan, Kohima nung October 10, 2023 nü agi aser iba mapang Angh-i kaketshirtem den sensaksema

parnok dang parnoki semdangba tesemtem aser ajuruba nisungtem nungi yimya tajung angazüka amshitsü ayongzuka liasü.

Pai asen linük lungjemba indanga tongmelang agi ashi aser kaketshirtem dang kongi otir oaka telungjem asoshi inyaksü ayongzuka liasü.

Paisa kaketshirtem asoshi iba sentong ayongzükter dang pelaba lemsatep aser India linük nung tesem balala sema sobaliba senmang tajungtem angazükdaksüba atema pelaba ashi.

Iba tour ya Dimapur nung Lieutenant General H S Sahi AVSM, YSM, SM, GOC, Spear Corps ajanga tenzükja liasü.

"A journey to envision your Future, Experience the pride & take the leap of Success" omen kübok iba sentong ya September 27, 2023 nü tenzük aser October 10, 2023 nü tembang. Iba tour ya Lt. Col. Gomit Dubey lenisüba kübok agia liasü.



CKS Conference Hall, Tuensang nung October 9, 2023 nü 28th Assam Rifles ajanga ayongzükba sentong ka nung CKS tir Nungsanglemba Chang den shimteta aliba Agniveer Candidates aser Assam Rifles ketdangsürtem külemi tangokba noksa nung angur.



Tzümetsüng agi konshir aliba Lachen tesem nungi Indian Air Force-i aninba alima penzürtem Sikkim nung Mangan kübok Ringhim Helipad tonga aruba noksa nung angur.

India nunger Israel den nokdaka lir: PM Modi

New Delhi, Mongputeni/October 10 (Agencies): Ato Kilonser Narendra Modi-i Mongolbarnü ashiba agi, Israel Ato Kilonser Benjamin Netanyahu-i pa dangi call süa, kiralongrar telok Hamas-i Israel amakba sülen Israel nung tensa koma ali iba indang metetdaksüogo.

"Phone call süa tang tensa indang metetdaksüba atema ni Ato Kilonser @netanyahu dang kanga pelar. India nunger tem Israel den masetshi-i nokdaka lir. India-i kiralongrara

inyakyim aitsür," ta Ato Kilonseri X sabang ajanga metetdaksü.

Honibarnü Hamas teloki Israel amakba sülen PM Modi-i iba osang angashia pa kanga aoksaba lemsatepogo. Social media sabang X ajanga Ato Kilonser-i, "kiralongrara temi Israel amakba osang angashia kanga aoksar. Onok tebilemba aser sarasadem tai maketba nübürtem shirnok tepsetogo parnok aser parnok kinungertem den lir. Tang ama tensa majungba mapang onok

Israel den nokdaka lir," ta ashi.

Israel aser Hamas na rara tenzüker Mongolbarnü anogo pezü jungogo. Iba rara nung asür 1500 dak tema jungogo.

Israel nung nisung 900 shi süogo, kong Gaza arrtsü anasa kenten benjung ka nung Hamas puri nisung 260 shi kasetba densema lir. Palestine nunga nisung 690 shi süogo.

United Nations Office of Coordination of Humanitarian Affairs-i ashiba agi, rara tenzüka sülen Gaza nung nisung 87,500 shi jenshiogo.

Jaishankar-i Sri Lanka semdanga Oct 11 nü IORA senden nung adentsü

New Delhi, Mongputeni/October 10 (Agencies): External affairs minister S Jaishankar-i October 10 nungi 12 tashi Sri Lanka semdanga Indian Ocean Rim Association (IORA) council of ministers' senden nung shilem agitsü aser Colombo nung lenirtem den senden amentsü.

Linük ana tsüngda tesendaktep akangshitsü atema Sri Lanka Tir Ranil Wickremesinghe-i July ita India semdanga sülen Jaishankar-i taküm tang agi tanabenbuba Sri Lanka semdangtsü.

Sri Lanka ya IORA mendenbuba lir aser October 11 nü senden amenba mapang India-i 2023 nungi 25 tashi iba telok indang vice-chair mapa agizüktsü.

Council of ministers' senden nung tawa IORA inyakyimtem lepa

rebrangshitsü aser tarutsü nung sendaktepa inyaksangshitsü asoshi sensak asemtsü.

India-i 2025-27 mapang IORA mendenbuba mapa agizüktsü, ta external affairs ministry-i ashi.

IORA senden nung shilem agiba dang masü saka Jaishankar-i Colombo nung shilem agitsü, ta ministry-isa metetdaksü.

IORA yagi Indian Ocean temeket nung aliba linüktem liromedema renloka aotsü asoshi inyaker. Iba telok nung Australia, Bangladesh, Comoros, France, Indonesia, Iran, Kenya, Malaysia, the Maldives, Oman, Singapore, South Africa, Tanzania, Thailand, aser United Arab Emirates densema lir.

Wickremesinghe-i India semdanga mapang India

indang Unified Payments Interface (UPI) system densema maritime, air, energy aser financial connectivity atema India aser Sri Lanka nati economic partnership tasen ka sayaogo.

India-Sri Lanka Economic Partnership nung ano electricity shishilembatsü atema power grid inter-connection ka, petroleum pipeline ka yanglutsüba, ali ajanga sendakteptsü asoshi bushisüngdangtsü, tang aliba shishilembaba tsütsü tenanzüktepba melentsü atema Economic & Technology Cooperation Agreement ka asoshi sensaksem tenzüksütsüba densema lir.

India indang NPCI International Payments Limited (NIPL) aser Lanka Pay na mulungtepba sülen taküm küm tatem nungibo Sri Lanka nung UPI agizüktsü.

कर्मचारी राज्य बीमा निगम
(एन ए ईएसआईसी) भारत सरकार
EMPLOYEES STATE INSURANCE CORPORATION
(Ministry of Labour & Employment, Govt of India)

পঞ্চদশ ভবন, শেখর কল্যাণ মহলাদী,
বামুনোইদাম, অসম-৭৮১০২১
Panchdeep Bhawan, Regional Office Guwahati,
Bamunoidam, Assam - 781021
Email : rd-assam@esic.nic.in Tel. : 0361-2550357
Website : www.esic.gov.in

NORTH EAST REGION NUNG PARAMEDICAL POST ATEMA NÜBU SHIMER

North East Region, ESIC nung Direct Recruitment ajanga regular nung tsünglanglen agüja aliba Paramedical Posts atema ONLINE Applications (ESIC website www.esic.gov.in ajanga) meshir:

A. DETAILS OF VACANCIES

Post/Category	UR	S	C	T	OBC	EWS	Total	PwBDs				Ex.SM	
								Category A	Category B	Category C	Category D & E		
ECG Technician	3	0	0	0	0	0	3	0	0	0	0	0	0
Junior Radiographer	3	0	0	0	1	0	4	0	0	0	0	0	0
Junior Medical Laboratory Technologist	0	0	0	0	1	0	1	0	0	0	0	0	0
OT Assistant	3	0	0	0	1	0	4	0	0	0	0	0	0
Radiographer	1	0	0	0	0	0	1	0	0	0	0	0	0

Advertisement indang vacancies, suitable category of Benchmark Disabilities for PwBD, Essential Qualification, Age Limit, Application Fee, Instructions for submission of Online Application, Scheme of Exam., aser danga tontipang totuyuba/teinyaktsütem ESIC [website www.esic.gov.in/recruitment](http://www.esic.gov.in/recruitment) nung angutsü. Tekalen shia aliba posts asoshi apply asütsü jangra aliba candidate temi mezüngbuba nung advertisement tejangja rebrangtsü ajungshir. Online application agütsütsü asoshi link ya ESIC website www.esic.gov.in nung **October 1, 2023** nungi angutsü.

ESIC website www.esic.gov.in ajanga Online Application ya October 30, 2023 tashinung agütsütsü.

Dated: 29th September, 2023.

Regional Director (I/c)

CBC 23123/12/0004/2324

J&K kübok Shopian nung LeT kiralongrar ana tepset

New Delhi, Mongputeni/October 10 (Agencies): Lashkhar-e-Taiba (LeT) telok den sendaka aliba kiralongrar ana Jammu and Kashmir nung Shopian kübok Alshipora nung security force den khatepba mapang kasetogo.

Alshipora nung kiralongrartem mongzüka aliba indang osang tejangja ka angazükba sülen security forces-i iba tesem meita aoba mapang kiralongrar den khatepa liasü.

Kashmir Zone Police-i social media ajanga ashiba agi, "#Shopian kübok Alshipora nung khatep tenzüko. Police aser security forces temi iba tesem meita odor. Osang tejangjaba atadar."

Tanga sangdong ka ajanga police-i, "kiralongrar ana tepsetogo. Bushisüngdang maneni südar. Osang tejangjaba mapang tatsüka tsüngda agütsütsü," ta metetdaksü.

Sepaitemi kasetba kiralongrara ana ya LeT nungi Morifat Maqbool aser Jazim Farooq (Abrar) ta jangjaogo.

ADGP Kashmir Vijay Kumar-i ashiba agi, Abrar ya Kashmir Pandit Sanjay Sharma tepsetba nung densema liasü.

Sanjay Sharma ya February ita Pulwama kübok Achan tesem nung par kima tepseta liasü. pa ya J&K Bank nung ATM guard ka ama inyaka liasü.

State Investigation Agency (SIA)-i taoba ita Sharma tepsetba ken o dak sendakba nung south Kashmir kübok district asem nung tesem tenet meita oa liasü.

"Tanü SIA, Kashmir-i Police Station Litter Pulwama nung benoka aliba ken o dak sendakba nung bushisüngdang tasen agia liasü. Iba ken o ya bank ATM guard Sanjay Sharma tepsetba dak sendaka liasü," ta police otongdar kati ashi.

"State Investigation Agency-i ashiba agi iba ken o ya judicial-i asadangtsü atema benoktsü. SIA-isa, temzüng ozüng shitak benoka inyaktsü asoshi parnok bendanga agütsür lir aser Sanjay Sharma tepsetertem nem temerenshi tesashi agütsütsü," ta otongdarisa ashi.

PMLA ken o nung ED-i nisung 4 apu

New Delhi, Mongputeni/October 10 (Agencies): Chinese mobile company Vivo dak sendakba nung Prevention of Money Laundering Act (PMLA) ken o ka benoka aliba bushisüngdangba mapang Enforcement Directorate (ED)-i Mongolbarnü nisung pezü puogo.

Ken o dak sendakba nung apurtem rongnung China nung Guangwen Kyang, shiba dang Andrew Kuang ta ajar, Lava International Managing Director Hari Om Rai, Rajan Malik aser Chartered Accountant (CA) Nitin Garg nung densema lir. Kasa mapang nung sena lakh 10 dak tema puogo.

Taoba küm July ita agency-i, iba company aser aser

company associates tem meita ao. China nunger ketdangsurtem aser India nunger firm tem aika densema aliba "money laundering operation" ka putetogo ta shi ED-i bushisüngdang tenzüka liasü.

Bushisüngdangba mapang ED-i ashiba agi, Vivo-i sen crore 62,476 ozüng alema China-i yoka liasü. India nung saru nungi jenbotsü atema parnoki sen ya China-i yoka liasü, ta PTI sangdong ka ajanga metetdaksü.

2020 küm arrtsü nung mepetmesü adokba sülen India nung China nunger company tem meita aoba tali aküm. Iba sülen TikTok densema mobile app 200 dak tema India nung shibangtsüogo.



Competition Commission of India mendenbula Ravneet Kaur-i, October 10 nü New Delhi nung taruba 8buba BRICS International Competition Conference atema Curtain Raiser sengtong nung osangbenertem den sensaksemba noksa nung angur.



TIR YIMYIM YIMOBILEM (EDITORIAL)

DIMAPUR RASEMNÜ, MONGPUTENI (OCTOBER) 11, 2023

Yimten meimba shisatsü

Koba lima nung südirsüaka senso ka asoshi pei tetsü taso lima meimba o yimten meimba tangatetba na külemi aoer. Aji oda, pei lima meimer sensotemi yimten khuret benloker, nüngsen aser takoksa aremer aser timtemyonga ochishia alitsü meranger. Itemji alima nung yimten angatetba senso ka dak aketba shisatsü, jakla aser mapa agi sayuba yimyatem asütsü. Item shisatsüji taso dang nungi keter asoba shisatsütem masü saka alima nung sor libalirua aodang pei kidang tsüraburtem nungi, kima yimdong aser kaketshidak medemer aser tesayurtem nungi aser lokti nung lenirtem nungi angazüksü. Aji oda, tanü tendak Nagaland nung alir ajak asoshi kanga nungdakba school ka lapokdi süra, pei yimten meimba tangatetba shisatsü ka senso shia mulungjang nung enoktsütetsüba school ka nungdaker. Nagaland nung alir sensosanger ajaki Nagaland nung election kanga junga aginer, Nagaland lenmangsa tajungba süner aser timtema bendangleni kaketshisatsü aser taneptsü bushii moi Nagaland nung zünger aser anepner. Ibaji senso ajak taginüba lir. Ajisüaka, Nagaland nung Naga nunger tsürabur zü nungi aruba agi mesüra Nagaland nung soa küm aika aliba kisüng agi akümba senso ta asüba kija agibo Nagaland topur junga meyanglutetsü. Ibaji hau ta asenoki asenoksasa shitetsü atema bilemdangra, tang Nagaland nung election junga magitetba ya tangari masü asenoki magiteter dang aser tanü Nagaland merenloktetba ya tangari akoksatsür masü saka Nagaland nung Naga nunger sensosangertemi raksar. Ibaji sensobo senso saka yimten khuret maliba aser pei tetsü taso lima memeimba senso asübayong lir. Pei yimten aser pei lima meimba agi pei rongsen agi pei lima aser nübor meyong rongsen kümdaktsür alima tasen ka yateta nüchiso agütsüsang, George Washington ama, tanü Nagaland nung Naga nunger senso ka danga lilasang, paibo pei sen agi Nagaland ajunga ya menoka yanglutsüla. Aji oda, pei tebu takar senmang toktsüba dang masü, pei tazungba aser tashitemetet tulu liaka coat-suit aser necktie ajak semzüka toktsür dhoti dang agir, peii metetba aser ajangshiba tashitemetet tashi tulu amshia pei nübortem asoshi yimten khuret benlokba nisung, Mahatma Gandhi dak aketba yimten angatetba tashi aser pei lima aser nübortem meimba shisatsü asenok daka lilasang, asenoki asen ki aser kibong topur ajungtsü dang meibilemi Nagaland topur jungdaktsütsü bilemla. Aji oda, Washington aser Gandhi dak aketba shisatsü tajung aser tesademji lilasang pei akatsü aser ulutsü dang meibilemi asenokia asen lima asoshi pei akaba rongsen aser temetetba ajak amshia inyakla. Tanü Nagaland yanglushinertemi iba ama yimten angatetba aser pei lima meimba shisatsü tanurtem aser lanurtem nem angazükdaktsütsü asoshi kaketreju nung dang masü saka yimten aser lokti ajak nung sayutsüla. Aji oda, tanübo senso temeten dang masü saka senso ka khuret aser teinyaktsü indang tangatetba agütsüba mapang aser 'political leadership class aser training' agütsüba sentongtem alitsü nungdaker. Tanü asenoki lanurtem dang election nung ochishia shilem agitsüla ta ajungshiba kisüng agi makoktsü aser makoker. Kasaji, asenoki tsüraburtem dang election nung pei vote mayoktsü atema shijen ashiba agi majungtsü aser majunger. Ibaji shi asütsü mozü magütsü ser shi tazü rangsaa 'operation' agir amai lir. Terasatsüka, tanübo asenoki Naga yimten temeten aser nübortem khuret aser teinyaktsü indang mejembii kümogo. Asenok jembiba ola ajak mapa shitak meinyaki sen angutsüba otsü dang kümogo. Aji oda, asenok ajak Nagaland dak anadaker alir dang ashi, asen aliba agi Nagaland wangshitsüsa asenoki malir. Terasatsüka, asenok teibilemba aser tangatetba ajunga agi Nagaland-i ni asoshi kechi inyaktsür? Nagaland dak nungi kechi mesükzüksü? Mapa kabo angur asü mangur? Ni agitsü percentage tilakabo lir mali? ta asüba shisatsü agi dang asenok tebok, tokolok aser temulungjang sünga lir. Item shisatsütemji agiteta endoker pei yimten aser nübor meimba shisatsü agi melen nung dang, Nagaland tajung asütsü.

OLEMSABANG

Mezüngpur aser tamapur dakji yimli alir

~ L.Kika pongener.

Aginüaka aser maginuaka, jungaka aser mejungaka, asen Ao kin dang, Naga nunger kintemi, lenla ajak nung mezüngpur/tamapur ta ajar, aser aji tajatsü tim dang ajar. Aji oda, alima ya melentepa aliba lima asünungji, ashiko, tanübo Ao kinji tangar kintem dang nungi kechisarena nung teküpokba aser tamajungba jenjang ka nung alitsüa akok. Ajisuaka, tanü jenjang mejungi lir ta ser, Ao kinji Naga nunger rongnung mezüng tenuk lapoka nuji akümba kin ta ajaba, iba konang narokümüji tangar kin kari memelentetsü. Aji oda, tanübo Ao kin nem iba konang naroküm tenung tajungji magütsünui karibo nukmia alitsüa akok. Ajisuaka, shirnoki pei tesayur dang tesayur ka ama akümtsübu mesayunur, parnokji kanga tia maka, pei tang takoksa asütsü, kechiyong ibajagi Ao kinji balaka ilaa/aso makümtsü. Angazükba agi Ao kin-i Khristan yimsu-a sayu aser mapa tamajung inyaktsüa sayu-a...ta sensa-masaa/tilu-panglua 'Social Media' nung prokshiba angazük. Aji oda, angazükba amaji shidak inyaka lira, asen Ao kin asoshia aji tansutsü, tekümdangtsü aser temulong adangtsü lesson ka sudaktsüdi aser asenoka melenshidi. Atangji, asenoki lenla ajak nung 'Samanir' kin ka ama jaklaliro yimya, aser mapa agi lia mesayutetba agi, tanübo tangar kini asen akümmetsübuttsüsa küm odagi. Ajisüaka, tanü jenjang mejungaka, Ao kinji Naga nunger rongnung lenla ajak nung mezüngpur/tamapur...ta ajabaji shingaia nembanga/ajembanga meyutetsü.


Asen Naga nunger ya tanü amai aliba masü, saka shiruru jenjang nung lia aliba, saka tanü iba amai jenjang tajung akümtsüsa nuji kümdaktsüba atema, Naga nunger kin ajungai America nunger Missionary-tem, shirnoki pei taküm samatsü mapayui, asen limai arur Yisu yimsu osangtajung sayua, asenok tenuk lapokja nuji kümdaktsü, parnok dang kanga pelatsüla. Ano jungaka-mejungaka, Ao kini Naga nunger kin kwika dang iba Yisu yimsu osangtajung sayua, tenuk lapoka nuji kümdaktsü, item kintem ajungai Ao kin dang pei tesayur ka ama kanga akümtsübuttsüla. Atangji, asen Naga lima ya tang amai aliba masü, yongji Assam nunger Bihu benjong nung... "Naga nungerji sowar kin"...ta ken atenbaji tim dang aten nung koda...asenoki ibaji manganui malitsüla. Otsüla oboula nunger tzüma limai Metsü (Salt) ali-i aludang, suoshi magi manglong/mangsa ser, küm songtema tzü mechigoba agi, temang nung teshinem menemba agi, parnok anasa ao majung, aser Hokken ozü den raktepa Nashi aser Jang tasü mang sena, khu sunga bener pelatepa shilangba tanü tashi otsü jembir, aji shibai nunga ta ashitsü. Ajisuaka, ano tanübo meyiper, asen Ao kin Tzüma lima tesem balala nung lua, Missionary inyaka, tanübo parnok rongnung kin karbo asen Ao kini nuji kümdaktsür masü no? Atangji, tanübo Naga nunger Missionary-temi Tzüma lima tesem balala nung school lapokja, Tsüngrem o tang masü libalirotsü/merukmejutsü sayua tenuk lapokja odagi.

Asen Ao kini Tsüngrem dang kanga pelatsüba aser America lima nungi oboula Dr. Clerk arua, Ao lima nung mezüng Yisu yimsu osangtajung sayuba atema, aser asen tsürabur shirnoki iba yimsuji agizüka amang, parnok dang kanga peladi, kechiyong parnoki limapur yimsu toktsür, iba Yisu yimsu osangtajung agizüka amangba agi tanü asen Ao kin iba jenjang tashi ajungketogo. Tanübo asenoki meyiper America lima-ia Missionary yoktsüsa Tsüngremi asen Ao kin ajungketogo, asenoki Tsüngrem tenung kanga sangdi. Atangji, Yisu yimsu osangtajung agi asen Ao kin nuji kümdaktsüyongji, asenok-ia iba temoatsüji asen dang magi-i, asen adianu anutoklen aliba kintem dangi iba osangtajungji bener oa parnoka asenok ama nuji kümdaktsüogo, anungji asen adianu anutoklen aliba kintemi, asen Ao kin dang kanga meima akümtsübuttsüla. Hau-niii...alima asünungji, Aotsür Aor-a nisung karbo tamajunga alitsü sudi...Ajisuaka, mezüngpurjisa mezüngpurji, Naga nunger tangar kintem tang nungi alakteta, alimai tushitsüsa lennir tajung/nubu tajunga aikasa lir-ko. Aji oda, tanü jenjang tera junga kümogo ta ser...Ao kin sensa-masa-a, tilu-panglua jembibaji, shiba sudir suang, pei sasa pei mezüngmeshir ta angatetsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Israel-Hamas rara ya Laishiba nung shia aliba tatem anogo nung shilem ka lir: Greg Laurie



Greg Laurie

Mongputeni/Oct. 10 (Agencies): Kaket zülur aser pastor Greg Laurie-i ashiba agi, Israel nung raraba ya Laishiba nung shinzüka aliba tsütsü mera tongtipang ka asütsü akok aser yimjung meimer temi Russia-Iran lungjemba kanga junga repranga alitsüla, koba lendong tulu asütsü.

Hamas kiralongrar temi Israel nung nisung 800 dak tema tepseta 1973 nungi arudang iba 'Holy Land' nung rara tulutiba adokba sülen hopta tatemlen Tsüngrem o jembidang Harvest Christian Fellowship nung pastor Laurie-i iba o ya ashi.

"Küm meyerijang aika jakdang Laishiba nung tatem anogo ya Irvine nung masü, Riverside nung masü, San Francisco nung masü, Los Angeles nung masü, Moscow nung masü, Paris nung masü Yirusalem nung tenzüksü shia lir. Tatem anogotem asoshi yagi tongti shilem agitsü," ta Laurie-i ashi.

US nungger tepuokdak alirtem melenteptsü nung shilem ka ama Iran nungger sen billion \$6 salatsü molungba atema Laurie-i Biden administration aitsü. Iran ya Hamas bhukumer linük ka lir.

"Alima nung kiralongra mapa inyaksü asoshi senotsü agütsüba linük nem sen agütsüba ya mera tamajung lir," ta Laurie-i ashi.

Iba sülen pai tang raraba ya Laishiba nung shinzüka aliba den medemdanga liasü. Item tatalokba ya 1948 küm tang aliba Israel kumtetba sülen nungi atalokyonga aru, ta pai ashi.

"Item shin o indang anü tetsü jaja tenzükba ya Israel nungertem tanaben adenshiba ya alitsü. Holocaust nung Nazi nunggeri nisung million 6 tepsetba sülen Yihuda nunggeri pei tasoli nung adenshitsü ta shibai bilema liasü? Ajisüaka yamaji atalok. Aser May 14, 1948 nü Israel ya linük ka akum. Iba linük ya United States-i

mezüng agizüka liasü."

Ezekiel 37 aser 38 nung Israel nungger adenshiba aser north tsütsü nungi Israel amakba indang shia lir, ta Laurie-i ashi.

"Tamaker tem ya Magog ta shia lir. Magog ya shirnok? Lai bushir aser sayutsüngir aikati ashiba agi parnok ya tanü Russia ya asütsü südi ta amanger. Anungji nai angateter alitsü. Middle East indang map nung Israel north tsütsü reprangdangra nai Russia angutsü. Kechiba Russia-i Israel maknüsü? Russia ya Magog süra, Laishiba nung ano ka shia lir - lar tembar linük ka la den Persia nung jajatsü. Persia ya tang aliba Iran indang akhi tenüng lir. Anungji tanaben adenshiba sülen Israel north tsütsü nungi tashi tulu kati la amaksü aser Israel amaker rongnung allies ka Russia mesüra Magog... mesüra Iram mesüra Persia alitsü ta küm meyerijang aika jakdang Laishiba nung shinzüka yuja lir."

Israel-i Iran ya makra, asenoki Ezekiel nung azüngba rara adoktsü, ta Laurie-i ashi.

"Laishiba nung Magog ya memolungseti aruba shia lir. La teküm nung poroki enoktsür atsür aruba shia lir. Iba ya Ezekiel 37-38 nung ama ataloktsü ta ashir masü, saka yangi tebilemdangtsü lir. Russia-i Israel amakba osang angazükra, ibaji Lai nung shia aliba ataloker asütsü. Anünglen reprangang, kechiaser temenen nungi na alanzüktsü mapang tonga arur asütsü," ta Laurie-i ashi.

Laishiba nung Yirusalem nung yimjung asoshi sarasademtsü shia lir. Yangji yimjung arutsü asoshi asenoki sarasademtsüla, ta pai ashi.

ANO GO ABEN TSÜNGREM DEN

Temenen nangzükba

Menangzükba aliba temeneni taochi kishi shibanger. Temenen nangzükba jagi taküm nung takümtsü tzü talubosa agizükdaksür.

Asen menen nangzükba jagi asen taküm nung Tsüngrem nem kishi lapoktsür saka asen menen miimbanga yura asen sasa mejembitetba Khrista dang nungi pilaa aor. Asenoki asen menen nangzükra, asen dang asen menen adoktsü pa temulung lemtetba aser ochi lir, aser pai asenok temeshiba nung merüktetdaksütsü.

Anungji, ni anogo shia Kibuba tsüngdang tatok nangzüksüla. Ni kodang Kibuba dang kü tamakok ashitsü tenzükra, aji ni takok lenmang nung jajatsü tetenzükra lir. Ni kodang kü menen asoshi mokorai lidir satan kanga pelar. Ni kodang Kibuba nem kü taküm bendanga agütsür satan sentong ajak benjatsür. Kodang ni laor, ni temenen tali bendenloker. Menangzükba aliba temeneni miim chanu rizükra aser tesempatsü mapatem rizükra. Taküm kobai temenen nangzükra, parnokji Tsüngrem taochi agi meshitettsür aser temenen ajak okdoktsür. Nai ya amanger asü?

Israel nung America nungger tamanger aika maruteti lir

Mongputeni/Oct. 10 (Agencies): Israel nungger nung atsükoka lir," ta Mason-i

maneni raraba alimai repranga atar. Israel nungi meyipa maruteti nisung aika anendaka aliba osangtem angazükra, kechiaser tayimtsü timba anena lir. America nungger arogo balala nungi telok aika tang yangji anendaka lir, aser parnok tekeraba nung pei ki bushia aotsü teimla nung atar.

Item rongnung Arizona Pastor Kane Adkins dena lir. Tesüba ghonda 24 tsüngta na asoshi tetsübotibaji kechi liasü ta asüngdang dang, "Kodang kechi ataloktsüar nai memetet aser ashitsü makok... na müketa aliba ki ajunga anokshir aser alarm angashir," ta Pastor Kane Adkins-i ashi.

Pa aser par kibong ya rara tenzükba mapang nungi Israel nung lir. "Airport tem sünga lir aser nisung meyerijang aika mapang shidak nung moteti lir. Onok meteta aliba airline ajanga onok asoshi ano maneni ticket book sütsütsü merang. Onok Bodhbarnü tashinung yoktsü meranger amai ajiteter," ta pai osangbener dang ashi.

Dallas Pastor Reverend George Mason-i osangbener dang ashiba agi, "Ni yipru nung lir amai, aser West Jerusalem nung azüng-azünger saka mile 40 majung pilar nisungtem tepsetba lir."

"Meimchir yimya memesük rara lir. Onoki apokba ola tulu angashi, Iron Dome ajanga rocket tem khazüka yok. Siren

ola angashir aser onok takdang nung atsükoka lir," ta Mason-i ashi.

Daphne nungi arogo nungger telok ka Israel nung lir. St. Paul's Episcopal Church züngsemtem Alabama nungi Israel-i ao. Pai Facebook Live video ajanga maneni sarasademmer.

"Brehostibar tashinung ajak ki tonger alitsü imlar. Nenoki sarasademtsüba atema kanga pelar. Tangbo onok kumzükba lir..." ta Reverend Thack Dyson-i ashi.

WKRK News Channel 5 nungi Chad Petri-i ashiba agi, iba arogo nungi züngsem 18 Tel Aviv nung lia Honibarnü azüdokshi ya tenzükba liasü. "Tang parnok North tsütsü ogo. Tesashitiba raraba tesem nungi pilar lir," ta Petri-i ashi.

First Baptist Church Fernandina Beach nungi Florida Pastor Zach Terry-i par arogopur kumzükba ayutsü aser lendong nungi pila alitsü asoshi sarasademtsü ayongzükba liasü. US nungger aliba arogo balala nungi züngsem aika tang Israel nung lir aser item rongnung First Baptist Knoxville, Holy Cross Church of West Fargo, aser Shades Mountain Baptist Church dena lir.

Tang tashibo parnok kumzükba lir. Rara manener asünung US nungger aikati pei tembar aser kinungertem asoshi shisabulor. Hamas-i amakba aser Israel-i meyiper tayang kepzükba ajanga linük balala nungi nisung aika asübang lir.

Youth With a Mission tenzüksang Loren Cunningham süogo


Kona, Mongputeni/Oct. 10 (Agencies): Khristan lanurtem telok, Youth With a Mission tenzüksang cancer agi süogo. Pa arishi küm 88 liasü.

Kaket zülur aser Youth With a Mission tenzüksang Loren Cunningham ya Kona, Hawaii nung Hokolbar (October 6) aonung mejangba mesaki asü, ta osang ajanga ashir.

Cunningham ya California nung 1935 küm aso aser arishi küm 13 lia revival ka nung Khrista agizük. 1956 küm pai mangdang ka angu ta ashir.

"Aoksa ni alima indang map repranga liasü, iba map ya takum aser arakzür! Ni continents ajak angu aser tzükum nung tzüsem agi kongshia liasü. Tzüsem ya continent shia dangi ao, aser anena liasü, aser ano adoka continent ajunga tzüsem agi asüng," ta pai shia liasü.

"Item tzüsem ya lanurtem akum - ni ama aser kundang



Loren Cunningham

tanubo - parnokki alima nung continents ajunga asüng. Parnoki yimtung aser bar kimalen nüburtem den jembia liasü. Parnok ki ka nungi ki kati oa Tsüngrem o lemsatapa liasü. Parnok ajaklen nungi aru aser ajakleni ao, nüburtem anepalu. Aser ibaji ajungbena aruba ama ajungbena sama."

Cunningham-i 1960 YWAM ya tentet aser tanübo alima nung iba telok indang

chapter 2,000 shi lir.

"Kaketshir ama, short-term volunteers aser full-time staff ama YWAM nung nisung million aika tenzükogo. Alima nung mission movements tajung aser tulutem rongnung YWAM ya ka lir ta aikati ashir," ta pa asüba sangdong nung shia lir.

Cunningham dak Stage 4 cancer putet ta par kinunger temi taküm March ita sangdonga liasü. Ajisüaka pa clinical treatments magitsü ta pa kinungtsü shia liasü.

"Pa arishi atsülangtsü mechi pa tashi ajemdaksüba chemo mesüra danga treatment magitsü ozüi telemtetba agiogo," ta lai shia liasü.

"Pa den Yisu, kinunger, tembar aser mangdang lir. Item dak alia kechi bushitsü?"

Cunningham-i kinungtsü Darlene, tanur David, Karen aser Judy den semchir asem yutsür asü.

AO OSHI ANGAZÜKDAK: TANÜ ANGAZÜKTSÜBA OJANG



Sangsü

(n) ai techira tapu ka (a kind of thatching grass plant)

* Arem nung sangsü alidak nempoka mouteter.

Sangtema

(adj) taotsüym ka tashi sanga aoba (fully extended)

* Alu nung mapu zü chirong tashi sangtema oa meyi.

OLONG PAITEP # 6663

Grid for crossword puzzle #6663 with numbers 1-19.

TIPIEN

- 2. Teburtemi tejak nung awaba - (8)
6. T ___ em - (3)
8. Tzük ayudak - (3)
9. Nungdakba dang timba - (6)
11. Züina ao - (4)
12. Yahgi tzü angur - (5)
14. Tangar dang nungi tali - (4)
16. Senyong masü - (6)
17. Oadokdi - (3)
18. Tzü tarok - (3)
19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
3. Nisung ka mapa inyaksü nübo - (4)
4. Azüntsü asoshi mejemba - (6)
5. Tesangwa agütsüba - (5)
7. Tila masü - (4)
10. Tebenjem tetsür chanu - (4)
11. Tekolak nung inok - (4)
12. Tetsüngda - (6)
13. Tangar inyakba ka inyak - (6)
14. Tim masü ta ashi - (5)
15. Asalendong - (4)
16. Tanü dangtsü - (4)

OLONG PAITEP # 6662 TELANGZÜBA

TIPIEN :

- 1. Telok, 4. Aluru, 6. Ozüng,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

- 1. Tenükjang, 2. Luden,
3. Kioktsü, 5. Lenti,
7. Tajangzük, 11. Teronem,
12. Sempa, 13. Jahaz.

Happy Birthday IMLIWAPANG. Includes photo of a child and birthday wishes.

Tepela Tasoba Anogo form with fields for name, school, class, and address.

Lachen nungi tourist ajak anientsü: MLA Samdup Lepcha



October 7, 2023 nü MLA Samdup Lepcha-i temporary zipline ka ajanga ayong süiba angur.

Gangtok, October 10, 2023

(Agencies): Lachen nungi tourist tem anienba maparen asüng tashi nung tembangtsü ta Lachen Mangan constituency MLA Samdup Lepcha-i ashi.

Tourist teimbaka Army-i tayimtsü ajanga anir ogo aser asüng tashi nung parnok anienba mapa tembangtsü ta Lepcha-i ashi.

Tourist aser parnok kinungertem shisabulutsü madoker. Parnok ajak kümzüka lir. Centre aser state sorkartemi tuyuba ama tourist ajak army-i tayimtsü ajanga anienogo" ta paisa ashi.

Lachen nung tourist noklang ka shi anünga aliba tanü anientsü. Thanguk nung alirtem Lachung ajanga aniener. Tanü

apu ka yangludar aser iba ya renemba sülen connectivity alitsü" ta Lepcha-isa shisem.

Lachen nung tensa mejungi lir. Lendong atalokba tziunoktang jakdang iba tesem ajanga Teesta ayong ayimer. Nisung ana iba lendong nung asü aser road connectivity maliba ajanga onok mesenzüteter. Onoki anogo pungunü tashi timtema aruogo" ta Lachen Mangan MLA-isa metetdaksü.

Tesüiba nung MLA Lepcha-i zipline ajanga tziunoktang aliba ayong ka ajanga süiba video ka prokshia liasü.

October 7, 2023 nü MLA Lepcha-i aniba telok kati Chungthang nung alirtem den ajuruteptsü atema ao. Tziunoktang ajanga Chungthang-i aoba apu ponger ao aser iba jagi Lepcha aser par teloki temporary zipline ka ajanga aotsüsa akim.

Imphal jail nungi Kuki nunger 18 Kangpokpi-i anir ao

Imphal, October 10, 2023

(Agencies): Imphal East District nung aliba Sajiwa Jail nung puoka alir Kuki nunger 18 tashi Kangpokpi District kübok Sapermeina Police Station-i anir ogo.

Nisung 18 ya Manipur kübok tesem balala nungi lir aser parnok ajak junga dang lir ta osang angazüker.

Indigenous Tribal Leaders' Forum (ITLF)-i Imphal Jail nung puoka aliba Kuki-Zo

Churachandpur District-i anientsü takhangba agütsüba ama Manipur sorkari iba mapa inyakogo.

Mongulbarnü A-Coy, 22 Assam Rifles Deputy Commandant LK Guresh-i Sajiwa Jail, Imphal nung puoka aliba nisung 18 Sapermeina PS Officer-in-Charge L Kipgen ket nung agütsü.

Parnok ya temporary prison ka nung puoker. September 22, 2023 nü state sorkari Border

Security Force (BSF) Subsidiary Training Centre nung iba tepuokdak lapoka liasü.

Prisoners Act, 1994 nung lateta aliba ama Churachandpur district nung BSF STC ya 'Temporary Prison' ta sangdongogo.

Tanü tepuokdak melenshirtem ya Imphal East, Churachandpur, Pherzawl, Tamenglong, Tengnoupal aser Kangpokpi nung alirtem lir.

Mizoram nung MLA 5-i menden toktsüogo

Aizawl, October 10, 2023

(Agencies): Mizoram Legislative Assembly (MLA) züngsem pungui party affiliations aser Anti-Defection Law nung ajemdaker menden toktsüogo.

MLA pungu ya independent candidate ama takok angu saka Zoram People's Movement (ZPM)-i parnok nungit.

ZPM-i yariba MLA pungu

ya VL Zaithanzama, Dr. Vanlalhlana, Lalchhuanthanga, C. Lalsawivunga aser Vanlalhlana nung lir.

2018 MLA mapang ZPM Party ya Election Commission of India (ECI) nung register masü liasü ta MLA temi ashir.

Iba jagi parnoki independent candidate ama toktep aser takok angu, ta parnoki ashi.

Ajisüaka ZPM party ya ECI

nung register süogo anungji parnoki khuret ka ajuruogo. Parnoki ZPM nungi tokteptsü atema MLA menden toktsütsüla. Iba ya Anti-Defection Law nung lateta aliba ama inyaker.

ZPM Party-i MLA 6 pusema nungiter. Parnok lennir Lalduhoma ya independent candidate ka ama toktepa takok ngua liasü.

Kohima nung Youth Voters' Festival agi



Dimapur, Mongputeni/Oct. 10

(TYO): Deputy Commissioner, Kohima indang Conference Hall nung October 10, 2023 nü 'Youth Voters' Festival 2023' sentong ayongzüka liasü.

Iba mapang SVEEP inyakim dak sendakba nung Youth Parliament session ka agia 'One Nation, One Election: A boon or a bane for Indian Democracy' omen nung o intepa liasü.

Iba o intepba nung Model Christian College, Japfii Christian College, Kros College, Nagaland University Meriema aser St. Joseph College nungi kaketshir temi shilem agia liasü.

Deputy Commissioner aser District Election Officer, Kohima, Shanavas C, IAS ajanga sentong

nung adener pela agizükba o jembidang, mangatetep aliba onük tongtipang ka nung o inteptsü aser jembitsü asoshi kaketshirtem aruba ngua temolung asür, ta ashi.

Democracy lima ka nung pei temeden asoshi awareness agütsütsü tang ya mapang lir, ta pai ashi.

Iba o intepba ya takok angutsü mesüra mangutsü atema masü saka shilem agütsü asoshi lir, ta DC Kohima ajanga ashi aser tanü election yimya nung rangloker election yimya shidak nung agütsü indang jembi aser asenoki democracy aser election shidak agir magir, ta asüngdanga liasü.

O intepba nung mezüngbuba jenjang Leah A Yeptho (St. Joseph

College) ajanga ngutet, tanabuba jenjang Kepozo Kapuh (St. Joseph College) aser tasembuba jenjang Keneisetsonuo Chatsu (St. Joseph College) aser Kaviseto Zuto (Japfii Christian College) nungertemi ngua liasü.

O intepba nung college balala nungi kaketshir 14-i shilem agia liasü. Takok anur nem DC aser DEO Kohima ajanga kulizüng kaket den senpet agüja liasü aser shilem agir ajanga nem kulizüng kaket agütsü.

Iba Youth Parliament Session nung tetendanger tem ya Jt. Chief Electoral Officer, Sharon Longchari; EAC Kohima, Dr. Riku Khutso aser SDO (C) Kohima, Pichano Kikon nungertem liasü.



Menoknok magnitude 6.3 anokba nung asürtem Afghanistan anüolen Herat province kübok Zenda Jan district nung yimsung ka tezulen leper ka nung nisung noklang aika aremba noksa nung angur. Honibarnü Afghanistan nung menoknok tesashi anoka nisung 2,000 dak tema asü aser 9,000 dak tema yiru, ta Taliban sorkari ashi.

Bangladesh opposition lenir Zia asütsü akok: Doctor

Dhaka, Mongputeni/ October 10 (Agencies): Bangladesh nung doctor temi Hombarnü ashiba agi, opposition lenir Khaleda Zia bendanglen oa temang anepalu mesüra asütsü akok. La linük toktsür aotsü atema mepeshiba ketdangsürtemi magizükba sülen doctor temi iba osang ya lemsatapa liasü.

Arishi küm 78 tain Zia ya taoba mapang anaben tashi Ato Kilonser liasü aser la lenisüba nung Bangladesh nung opposition party tongtiba Bangladesh Nationalist Party (BNP) inyaksangshir. La ya 2020 küm tepuokdak nungi chiokba sülen house arrest nung yua liasü.

La advanced liver cirrhosis, diabetes aser temulungjang tashidak agi tonger lir aser PM

Sheikh Hasina-i aniba sorkari taoba hopta lar kinurtemi la temesen transplant asütsü atema Germany-i anir aotsü asoshi mepeshiba magizüki liasü.

Zia aser Hasina na ya yimden yimsüsüba nung tsükchir lir aser tenati Bangladesh nung yimden yimsüsüba küm 40 shi amokbanger arudar.

Bangladesh yimtiba nung nija mozüki ka nung doctor 17-i taoba ita ana tashi Zia temang anepalua arudar aser parnokia par kinungertemi mepshiaba pusemogo aser ashiba agi, la temang tamajungba küma odar. "La asütsü akok," ta hepatologist Nooruddin Ahmad-i osangbenertem dang ashi.

Parnoki ashiba agi, pa tangola sashitsü mesademi kümogo. Kasa mapang nung F.

M. Siddiqui-i ashiba agi, Bangladesh nung koba tashi anepalutsü koka liasü iba tashi anepaluogo aser onoki joko kecha minyaktettsü.

Linük taruba küm January ita election agitsü renemba mapang Zia süra opposition temi anir longkak kanga sashia aitsü imlar.

2018 küm Zai ya graft atema tepuokdak küm 17 ayutsü obendang agütsü aser küm ana tepuokdak yur chioka liasü. Lai la aitsüba ya magizüki arudar aser ashiba agi, la aitsüba ya yimden yimsüsüba dak sendaka lir.

BNP legal chief Kayser Kamal-i, sorkar-i la meyoktsü atema telemetba agiba aitsüogo aser iba ya yimden yimsüsüba tsütsü mang ayangba ka lir, ta ashi.

Myanmar nung military-i refugee camp ka amak; nisung 29 tepset

Yangon, Mongputeni/ October 10 (Agencies): Myanmar anütoktiplen China den arrtsü nung amenoka aliba refugee camp ka military-i amakba sülen tanur densema nisung 29 tepsetogo.

Local media sangdong balala ajanga ashiba agi iba camp ya Kachin state nung Laiza jila anasa amenoka lir aser iba tesem ya Hombar aonung maka liasü.

Iba camp ya Kachin Independence Army headquarters nungi km ishika pilar lir. Kachin Independence Army aser Myanmar military na joko küm aika raratepa arudar.

Kachin Peace Network Civil society group nungi local activist Khon Ja-i Reuters news agency dang ashiba agi, lai local mozüki semdangogo aser la dang nisung 29 asüba aser nisung 59 yiruba metetdaksüogo.

Otongdar Jacob-i ashiba agi, military-i anüing ajanga aonung 11 ako meta iba camp amakba sülen tanur 13 aser tain nisung 19 tepsetogo.

Social media nung lemsatepba noksa nung teküzmükertemi amang nung ki teraksa nungi tasü mangtem agitetba nguogo.

Kasa mapang nung National Unity Government (NUG) indang human rights minister

Aung Myo Min-i X sabang ajanga iba camp amakba aitsüogo aser ashiba agi iba ya war crime ka lir. Paisa, nisung 56 shi yiruogo, ta ashi.

KIA indang Colonel Naw Bu-i ashiba agi, camp ya kechi koma amak aji tang parnokki bushisüngdangdar.

"Onoki tayimtsü ola kecha mangashi," ta pai AFP news agency dang ashiba den military-i drone amshia iba camp amak asü masü aji tang parnokki bushisüngdangdar.

2021 küm February ita Myanmar nung military-i sorkar atsüngba sülen nüburtemi military anema nokdak tenzüki aser mepetmesü tulu adoka liasü. Iba sülen military-i tayimtsü amshia tesem aika maka arudar aser iba mapang nisung aika tepsetogo aser aika pei talidak ki toktsür jenshiaogo.

Taoba küm October ita military-i, Kachin nung KIA-i ayongzükba sentong ka maka nisung 60 tepseta liasü.

Kasa mapang nung junta otongdar kati Mongolbarnü local media dang ashiba agi, military-i Kachin state kübok China den arrtsü nung aliba camp ya mamak.

Zaw Min Tun-i People Media dang ashiba agi, "onoki ken o bushisüngdangdar. Onoki arrtsü yimjung nung toktsütsü atema inyaker."

Gaza nung civilian dak makra onoki pua alirtem tepsüttsü: Hamas

Tel Aviv, Mongputeni/ October 10 (Agencies): Israel-i kümdangshia alitsü atema osang kecha magütsüi Palestine nunger ki ka amakba shia Hamas puri parnokki pua aliba Israel nunger kaka tepsettsü ta amokmerenogo.

Israel-i tang sepai 300,000 shi anidenba mapang lir aser Gaza Strip ajunga mokdanga yuogo aser iba ajanga Gaza nung alir million aika chiyongtsü, tzü aser totzü makai kümogo.

Hamas puri iba tekümdangtsü ya Hombarnü sangdonga liasü. Hopta tatemi Israel amakba sülen Israel nung asür 900 jungogo aser kasa mapang nung Israel nunger sepaitemia Gaza Strip nung nisung 700 dak tema tepsetogo aser nisung 3,700 shi yirutsüogo.

Israel nunger fighter jets, artillery aser drone temi residential apartment block, mozüki, school tem aser mosque ka makogo, ta media sangdong balala ajanga metetdaksüogo.

Israel Foreign Minister Eli



Israel-i tayimtsü amshia Gaza yimti kübok Sousi mosque amakba sülen Palestine nunger temi iba tesem semdangba noksa nung angur.

Cohen-i ashiba agi, Hamas puri nisung 100 dak tema purogo.

Israel nunger sepaitemi Hombarnü Gaza amakba mapang Israel Defence Minister Yoav Gallant-i Gaza mokdanga ayutsü osang sangdongba sülen pa lenla balala nungi aitsüogo. Gaza nung nisung million 2.3 alir.

Gallant-i ashiba agi, Israel-i Gaza ajunga mokdanga ayutsü. "Electricity, cchiyongtsü, tzü, gas ajak shibangtsüogo," ta pai ashi.

United Nations Secretary-General Antonio Guterres-i, Gaza mokdanga ayutsü sangdongba ajanga pa kanga shisabulua bilemer ta ashiba den, Gaza taoba mapang nungi timtem nung arudar aser Israel-

i iba jenjang agiba ajanga humanitarian tensa kanga tamajungba akümtsü, ta shisem.

Guterres-isa, nisung 137,000 shi UN Relief aser Works Agency for Palestinian Refugees (UNRWA) kübok Gaza nung school tem nung jenoka lir.

UNRWA-i Mongolbarnü ashiba agi, Israel-i Gaza amak tenzüka sülen nisung 190,000 dak tema jenshiogo aser ano nüburtem aika talidak makai akümtsü imlar, kechiyong rara tamajungba küma aotsü akok.

Nisung million tesadang ka iba hopta chiyongtsü magizük, kechiyong Israel-i iba tesem amakba ajanga UN food distribution centre tem

shibangtsüsa kümogo, ta UNRWA-i ashi.

Human Rights Watch-i ashiba agi, Gaza nung alirtem ajak anogoshia tenüngdakattem nokdanga ayuba ya war crime ka lir.

"Tesem ka nung alirtem nem chiyongtsü aser electricity magütsüba ya temerenshi ka aser iba ya war crime ka lir, kechiyong yatzüra ya rara nung hadir ka ama amshir. International Criminal Court-i iba ya angaoka ayutsü nsüngdaker," ta pai ashi.

Shakir-isa, Hamas puri parnokki pua aliba Israel nungertem tepsettsü amokmerenba ya war crime ka lir ta shiogo.

Kasa mapang nung Egypt tir Abdel Fattah el-Sisi aser Turkey tir Recep Tayyip Erdogan nati Hamas aser Israel na dang rara anentsü aser civilian tem kümzüka toktsütsü ayongzükogo.

Erdogan-i, Israel dang civilian tem makmaktsü mepeshiba den telok anaprongla dang rara inyakyim akümtsübuttsü mepeshia liasü.

United Kingdom, French, German, Italian aser US sorkartemi külem sangdong ka ajanga Palestine nunger tejangraba agizükogo aser Israel aser Palestine nunger ajak asoshi nüjiso aser ochi obendang agütsütsü pusemogo.

US national security council spokesman John Kirby-i ashiba agi, Israel atema teyari mezüngbuba shilem yokogo aser teyari talila yakdang sangdongtsü.

Maneni US joint chiefs of staff, mendenbuba General Charles Q. Brown Jr.-i Iran dang iba rara nung shilem magütsü tekümdangtsü metetdaksüogo.

US, Germany, France, Italy aser UK nungi lenirtem sensaksemba sülen parnokki maneni Israel nongita yariba aser Hamas-i kiralongrara inyakyim benoka inyakba aitsüogo.

2buba BAM angati boxing coaching camp tenzükogo



P. Shilu Ao Park, Imkongmeren Sports complex nung 2buba angati Boxing Coaching Camp ayongzüka asayaba mapang October 10 nü DYRS Boxing Coach aser NABA Vice President (tachichi) Lakatsu Chophy-i Mokokchung nungi lanur asayartem nem tangazükba agütsüba noksa nung angur.

Mokokchung, Mongputeni/October 10 (TYO): Boxing Association Mokokchung-i ayongzüka 2buba Intensive Free Boxing Camp, P. Shilu Ao Park, Imkongmeren Sports Complex nung October 10 nü tenzükogo.

Iba camp atema DYRS nungi professional boxing Coach aser NABA Vice-President Lakatsu Chophy head coach asütsü.

Iba coaching camp ya Department of Youth Resources & Sports (DYRS) aser Nagaland Amateur Boxing Association (NABA) den longjemer ayongzüka agidar.

Camp lapokba sentong nung o tatsüka jembiba mapang BAM tir Lanuakum Imsong-i, lanur asayartem dang peisasa dak tamang akatsü aser saisapong nung temaba jenjang

tongtetsü atema nukjidong ayutsü ajungshia liasü. Paisa, Boxing Association Mokokchung (BAM)-i boxing asayatsü jangraba lanurtem Mokokchung adena orr state, national aser international jenjang nung parnok asayaba mapang temaba jenjangi atutsü, parnok ajungketsü aser parnok nukjidong ataloktsü atema lenmang lapoktsütsü asoshi takokba tashi inyaktsü, ta ashi.

Camp Head Coach, Lakatsu Chophy, shiba state nung boxing asayartem rongnung tejentiba ka lir pai, boxing camp nung shilem agitsü atema tejangraba tulu nung tenüing züngoksemer aliba lanur boxer tem ngua kanga temulung asüba lemsatapa liasü.

Iba sentong nung Kumlong Baptist Church, Associated Pastor (Child Ministry)

Moanaro Imchen-i camp tepeyong Tsüngrem temaotsü ma nung aotsü atema sarasademja liasü.

Kasa mapang nung BAM-i camp atema tenüing züngoksemsü asoshi October 12 nü tashi mapang atsülangtsüogo. Tenüing züngoksemsü asoshi 3:00 ako nungi mapang lapoktsütsü. Camp ya nikongtsütsü 5:00 ako nungi tenzüktsü.

Maneni camp nung shilem agitsü temsüa aliba boxing asayatsü jangrartem dang camp atema pei tenüing züngoksema shilem agitsü ajungshi, kechiyong camp nung kanga junga shilem agirtem boxing nung parnok career yanglutsü asoshi shima teyari agütsütsü, ta BAM Media Cell sangdong ka ajanga metetdaksü.

UK aser Ireland nung Euro 2028 ayongzüka asayatsü

Nyon, Mongputeni/October 10 (Agencies): United Kingdom aser Republic of Ireland na nung Euro 2028 ayongzüka asayatsü aser Italy aser Turkey na nung 2032 küm iba asayamung ayongzüka asayatsü asoshi temelaba agütsüogo, ta UEFA-i Mongolbarnü metetdaksü.

Telok anaprongla den tetokteper maliasü, saka European football's governing body nung temelaba agitsü nüngdaka liasü, koba Switzerland nung senden ka amenba sülen nguogo.

Turkey-i taoba hopta Euro 2028 ayongzüka asayatsü asoshi bid asüba nungi atsüingina liasü aser iba ajanga Britain aser

Ireland nem lenmang lapoktsü, shirnoki European Championship ayongzüka asayatsü asoshi rangloker inyaktsü atema 2030 World Cup atema bid asütsü sentong aliba nungi atsüingina liasü.

Turkey-i 2008 küm nungi Euro ayongzüka asayatsü atema merangdanga arudar aser parnok 2028 aser 2032 naprongla atema candidate liasü.

Ajisüaka July ita parnoki Italy den külemi 2032 Euro atema bid asütsü asoshi mulunga agizük, ajisüaka iba mapang 2028 atema bid asüba nungi atsüingina indang kecha osang magütsü.

England-i taoba küm tetsür

Euro asayamung ayongzüka asayaogo aser parnoki Euro asayamung ya 1996 küm tatemsa ayongzüka asayaogo.

England-isa Euro 2020 final asaya ayongzüka asayaogo, koba wara ajanga küm ka thinener Europe kübok linük balala nung ayongzüka asaya liasü.

Euro 2020 nung Italy nunga asayatem ayongzüka asayaogo, saka 1990 World Cup sülen parnok kijai asayamung ka danga ayongzüka mali.

Turkey kong taküm Istanbul nung Champions League final ayongzüka asayaogo, parnoki tongtibang international asayamung ka danga ayongzüka asaya mali.



October 10 nü Ato Kilonser Modi-i Major Dhyan Chand National Stadium, New Delhi nung Asian Games nung medal angurtem den sensaksemba noksa nung angur.

Rankireddy aser Shetty na World No. 1 tarep kümogo

Mongputeni/October 10, 2023 (Agencies):

Satwiksairaj Rankireddy aser Chirag Shetty na Mongolbarnü India nung tarep asayartem rongnung mezüngbuba world number one tarep kümogo. Hangzhou Asian Games nung gold medal anguba sülen tena No 1 asayar kümogo.

Taoba Deobarnü Hangzhou nung Asian Games nung India asoshi badminton asaya nung mezüngbuba gold medal anguba sülen Satwik aser Chirag na BWF World Rankings nung jenjang ana tejakdangi tua tang temaba jenjang nung lir.

India nung rongnungi world number 1 tonga asayaba asayar Prakash Padukone, Saina Nehwal aser Kidambi Srikanth nung den tenata densemogo.

Satwik aser Chirag nati Commonwealth Games-a kokogo aser Asia Championships nunga gold medal ngua lir aser tenati taoba Deobarnü final asaya nung South Korea nung tarep Choi Solgyu aser Kim Wonho na 21-18 21-16 agi koka liasü.

Satwik aser Chirag nati taoba küm world

championships nunga bronze medal ka ngua liasü aser 2023 küm March ita Swiss Open nung mezüngbuba title abenba sülen April ita Dubai nung Asian Championships asayaba mapang gold medal ngua liasü.

Iba sülen tenati June ita Indonesia Open koka India nung rongnungi BWF Super 1000 tournament ka akokba mezüngbuba tarep aküm. Tenatisa Korea Open Super 500 title bena ranking nung maneni tejakdangi atu.

India nung asayartem rongnungi PV Sindhu jenjang ana tejakdangi tua 13buba nung lir aser HS Prannoy shibai küm 41 sülen Asian Games tebur kija asaya nung India asoshi mezüngbuba medal ngua liasü pa jenjang ka asepzüka lua tang 8buba nung lir.

Lakshya Sen, shibai tebur team-i silver medal ngua asayaba mapang asaya anaprongla koka liasü, pa-a jenjang ka asepzüka lua tang 15buba nung lir aser Kidambi Srikanth 20buba nung lir.

Tetsür tarep asayar Gayatri Gopichand aser Treasa Jolly nata jenjang ka tejakdangi tua 16buba nung lir.

Kabaddi League: Chiyaneh sen tasaktiba agi alizük

Mongputeni/October 10, 2023 (Agencies):

Pro Kabaddi League auction nung Iran nung asayar Mohammadreza Shadloui Chiyaneh, Puneri Paltan-i sen crore 2.35 agi alizüka pa sen timtiba agia alizükba asayar kümogo. Kasa mapang nung India nung asayar Maninder Singh-a Bengal Warriors-i sen crore 2.12 agi alizükogo.

Anogo ana auction ya Hombarnü tenzük aser team 12-i category A aser B asoshi India aser bendanger asayartem atema bid süa liasü. Mongolbarnü categories C aser D atema auction süogo.

10buba PKL nung asaya 137 asayatsü. League asaya 132 asayaba sülen playoff asaya pongu asayatsü, kong eliminators ana, semifinal ana aser final ka densema lir.

Category A asoshi base price ji sen lakh 30, category B atema sen lakh 20 aser category C aser D atema base price ji sen lakh 13 aser 9 lir.

Iran captain Shadloui (all-rounder) shiba Asian games final nunga shilem agia liasü, pa asoshi tetenzüklen team aikati bid asü aser iba ajanga otsü

tasen ka yanglua pa ya sen timtiba agi alizükba asayar aküm.

U Mumba aser Gujarat Giants nati mezüng bid asü aser iba sülen Puneri Paltan aser Telugu Titans na aden. Iba sülen Iran nung asayar ya Puneri Paltan-i sen crore 2.35 agi alizük, kechiyong pa taoba mapang asayaba team Patna Pirates puri Final Bid Match (FBM) mamshi liasü.

Gujarat Giants-i Fazal Atrachali sen crore 1.60 agi alizük. Iran nung asayar ya defender tem rongnung sen timtiba agi alizükogo.

India nung all-rounder Rohit Gulia sen lakh 58.50 agi Gujarat Giants-i alizükogo.

All-rounder Vijay Malik atema Bengal Warriors, UP Yoddhas, Telugu Titans aser U Mumba nungeri bid asü aser UP Yoddhas-i sen lakh 85 agi alizükogo.

Indian raider Maninder, shiba Jaipur Pink Panthers aser Bengal Warriors nungi asayaogo pa Telugu Titans-i sen crore 2.12 agi alizükogo.

Maneni Manjeet-a Patna Pirates-i sen lakh 92 agi alizükogo.

BILEMDANGANG

"Tebilemdangba tajung agi alima melenshitsür."